

ЭНЕРГЕТИКА ЖҮЙЕСІН РЕТТЕУДІ ТАПСЫРДЫ



Мемлекет басшысы Қасым-Жомарт Тоқаев Маңғыстау облысының әкімі Нұрлан Ноғайты қабылдады.

Аймақ басшысы Президентке Маңғыстау облысының биылғы 7 айдағы әлеуметтік-экономикалық даму қорытындыларын және алдағы жоспарларын баяндап берді.

Нұрлан Ноғайты Мемлекет басшысына есепті кезең ішінде өңірде жалпы сомасы 5,3 миллиард теңге болатын 6 инвестициялық жоба іске қосылғанын айтты. Жалпы, қантар-шілде айларында өңірдің негізгі капиталына бағытталған инвестиция көлемі 523 миллиард теңгені құрады.

Сонымен қатар Мемлекет басшысына ауысу тапшылығын шешуге қатысты тапсырмасының орындалу барысы туралы мәлімет берілді. Бұл мәселені кезең-кезеңімен шешу үшін облыста 2025 жылға дейін 6 жоба жүзеге асырылады. Нәтижесінде, тұштытылған судың көлемін 146 мың текше метрге дейін арттыруға мүмкіндік туады.

Сондай-ақ Президентке Ақтау қаласының тұрғын үй-коммуналдық шаруашылығын жетілдіру және инженерлік инфрақұрылымын қалыптастыру, Маңғыстау атом энергетикалық комбинатына (МАЭК) күрделі жөндеу жүргізу мәселелері жөнінде баяндалды.

МАЭК-ке жөндеу жұмыстарын жүргізу үшін биыл 9,4 млрд теңге қаржы бөлінген. Оның ішінде 6,8 млрд теңге МАЭК-тің инвестициялық бағдарламалары аясында, ал 2,6 млрд теңге Маңғыстау облысы әкімдігінің резервінен бөлінді. Бұған қоса, Президенттің тапсырмасы бойынша Үкімет резервінен қажетті қондырғыларды сатып алу үшін 4,9 млрд теңге қаржы қарастырылды.

Кездесу соңында Мемлекет басшысы облыс әкіміне Маңғыстау өңірі энергетика жүйесінің үздіксіз жұмыс істеуін қамтамасыз етуді және өңірдің әлеуметтік-экономикалық дамуының кешенді жоспары аясындағы міндеттерді іске асыруды тапсырды.



ХАЛЫҚАРАЛЫҚ МӘСЕЛЕЛЕР ТАЛҚЫЛАНДЫ

Президент Қасым-Жомарт Тоқаев АҚШ Сенаты Ұлттық қауіпсіздік және Үкімет істері жөніндегі комитетінің төрағасы Гэри Питерсті қабылдады.

Мемлекет басшысы сенаторға ілтипат білдіре отырып, оның сапары екіжақты ынтымақтастық мәселелері бойынша жан-жақты пікір алмасуға жақсы мүмкіндік екенін атап өтті.

— Америка Құрама Штаттары жаһандық қауіпсіздікті нығайту, ядролық қаруды таратпау, экономикалық тұрақтылықты қамтамасыз ету және демократиялық құндылықтарды ілгерілету ісінде әрдайым біздің еліміздің стратегиялық серіктесі саналған. Біз көп нәрсеге қол жеткіздік ойлаймын. Әйтсе де, екі елдің мүддесіне сай келетін салалардағы өзара ынтымақтастығымызды нығайту үшін алға қарай жылжыуымыз керек, — деді Президент.

Әңгімелесу барысында Қасым-Жомарт Тоқаев биыл қыркүйек айында БҰҰ Бас Ассамблеясы алаңында «C5+1» форматында өтетін АҚШ пен

Орталық Азия мемлекеттері басшыларының алғашқы саммитіне шақырғаны үшін Президент Джо Байденге ризашылығын білдірді.

Өз кезегінде сенатор Гэри Питерс Америка Құрама Штаттары мен Қазақстан арасындағы қарым-қатынасқа қатысты негізгі мәселелерді талқылау мүмкіндігі үшін Қасым-Жомарт Тоқаевқа алғыс айтты.

— Орталық Азия — әлемнің маңызды бөлігі, ал Қазақстан — Орталық Азия өңіріндегі негізгі мемлекеттердің бірі. Сондықтан біз алдағы уақытта ынтымақтаса жұмыс істеуге мүмкіндігіміз бар екеніне көз жеткізіміз келеді. Бұл пікірді Президент Байден де құптады деп ойлаймын. Ол Сізбен таяу уақытта Нью-Йоркте кездесуге ниетті. Бұл кездесу біздің қарым-қатынасымызды нығайтуға оң ықпал етеді деп ойлаймын, — деді АҚШ сенаторы.

Кездесу барысында сондай-ақ халықаралық және өңірлік күн тәртібіндегі өзекті мәселелер талқыланды.

АҚОРДА

Оңтүстік Африка Республикасының Президенті Сирила Рамафосаның шақыруымен Қасым-Жомарт Тоқаев бүгін 15-ші БРИКС саммиті аясында Йоханнесбургте өтетін мемлекеттер басшыларының «БРИКС плюс» диалогы отырысына бейнебайланыс арқылы қатысады.

Жиында Мемлекет басшысы Шанхай ынтымақтастық ұйымының қазіргі төрағасы ретінде сөз сөйлейді.

ПАРТИЯ ТӨРАҒАСЫ АЗАМАТТАРДЫ ҚАБЫЛДАДЫ



Парламент Мәжілісінің Спикері, «AMANAT» партиясының Төрағасы Ерлан Қошанов өткен сейсенбі күні партияның Республикалық қоғамдық қабылдау бөлмесінде азаматтарды жеке қабылдады.

2 >>

САЙЛАУАЛДЫ УӘДЕЛЕР МҮЛТІКСІЗ ОРЫНДАЛАДЫ

Кеше «AMANAT» партиясының Абай облыстық филиалының кезектен тыс VIII конференциясы өтті. Партиялықтар 2021-2022 жылдарда атқарылған жұмысын қорытындылап, алдағы жоспарын бекітті. Жиын барысында партияның қалалық, аудандық филиалдарындағы Саяси кеңестердің жаңа құрамы сайланды. Осы ретте өңірдегі Саяси кеңестер құрамы 55%-ға жаңарып отыр.



Іс-шараға өңірдегі Саяси кеңес мүшелері, барлық деңгейдегі мәслихат депутаттары, қоғамдық кеңестердің мүшелері, бастауыш партия ұйымдары мен «Жастар Рухы» жастар қанатының өкілдері қатысты.

Конференцияда хабарланғандай, өткен екі жылда партияның Сайлауалды бағдарламасын жүзеге асыру аясында Абай облысының аумағында 700 мың

шаршы метр тұрғын үй салынған. Әлеуметтік жағдайы төмен отбасыларға 905 пәтер табысталып, 20 мыңға жуық жұмыс орны және 4 жаңа мектеп ашылған. Сондай-ақ радионуклидтік терапия бөлімшесі бар бірегей Ядролық медицина орталығы қолданысқа берілді.

(Жалғасы 3-бетте)

ДЕПУТАТТАР – ӨҢІРЛЕРДЕ

Алматы облысында 11 мектеп пен бір балақшада күрделі жөндеу жүріп жатыр. Оның төртеуі жыл соңына дейін, ал қалғаны келесі жылы пайдалануға беріледі.

Өңірді жұмыс сапарымен аралап жүрген Мәжіліс депутаты, «AMANAT» партиясы фракциясының мүшесі Жанарбек Әшімжан Талғар ауданының Белбұлақ ауылында күрделі жөндеу жүріп жатқан мектепке барды. Білім мекемесінде 600-ге тарта бала оқып келген. Құрылыс жоспар бойынша келесі жылдың наурыз айында бітуге тиіс. Бірақ мердігерлер осы жылдың соңына дейін аяқтап береміз деп отыр. Оған дейін балалар осы елді мекендегі ескі мектепте оқиды.

— Бұл мектеп 60 жыл бұрын салынған. Сол жылдан бері қарай ешқандай күрделі жөндеу жұмыстары жүрмеген. Күрделі жөндеу уақытында 640 оқушы №32 мектептің ескі ғимаратында оқитын болады, — деді Талғар ауданы әкімінің орынбасары Айбек Бидаев.

Қала іргесіндегі білім ордalarında орын тапшылығы — басты мәселе. Тіпті, үш ауысымда білім беретіндері бар. Бұл мәселе «AMANAT» партиясының назарында. Жол картасында көзделген

жоспарларды орындау мақсатымен Мәжіліс депутаты білім беру нысандарын аралап, оқу жылына дайындықтарын тексерді.

— Былтырдан бері өңірлерді аралап келемін. Үш ауысымды мектептердің проблемасы әр облыста бар. Өңірдегі қала іргесіндегі мектептердің мәселесі күн тәрті-

бинде тұр. Әсіресе, Талғар, Еңбекшіқазақ, Іле ауданында мұны жеделдетіп шешу керек. Өйткені саяжайдағы азаматтар балаларын көршілес елді мекендегі мектептерге тасып әлек, — деді Жанарбек Әшімжан.

(Жалғасы 3-бетте)



МАЛ ҰРЛЫҒЫ МАЗАНЫ ҚАШЫРДЫ

Соңғы жылдары Сыр өңірінде мал ұрлығы өршіп тұр. Әсіресе, ірі қара малына қырғидай тиген ұрылардың әрекетіне тосқауыл қойылар емес. Малшылар қауымы осылай деп дабыл қақты.

Мал шаруашылығымен айналысатын кәсіпкерлердің айтуынша, мұндай жағдай жыл сайын қайталанып келеді. Қанша мәрте полицияға арызданса да, жергілікті әкімдікке мәселесін жеткізсе де, нәтиже болмай тұрғанын алға тартады. Ессесіне, жыл өткен сайын жағдай ұшығып бара жатқаны байқалады. Арыздарына тиісті жауап ала алмай жүргендеріне де ашынады.

Жалпы, мал ұрлығы ең көп тіркелетін аймақтарда Қызылорда облысының көрсеткіші басым. Әсіресе, облысқа қарасты аудандардағы ахуалды ауыздықтау мүмкін болар емес. Ең өкініштісі, малды атып алып, тиеп келетіндерге қатаң шара қолданылмай отыр. Шырылдаған шаруалар жергілікті құзырлы орындардың дәрменсіздігіне ашынады.



(Жалғасы 7-бетте)



«ТАЛДАУ МЕКТЕБІНІҢ» САРАПШЫЛАРЫМЕН КЕЗДЕСТІ



Сенат Төрағасы Мәулен Әшімбаев «Талдау мектебі» жобасына қатысушылармен және Жас сарапшылар клубының мүшелерімен кездесті. Кездесуде Мемлекет басшысының елімізді жаңғырту бағдарын іске асыру жөніндегі идеялар мен бастамалар талқыланды.

Қазір жас сарапшылар Сенаттың қолдауымен еліміздің әлеуметтік-экономикалық да-

муына қатысты ұсыныстар мен талдамалық материалдар дайындап жатыр.

Сенат еліміздің заңнамасын жетілдіруге қатысты ұсыныстар даярлауға сарапшыларды жүйелі түрде жұмылдырып келеді.

Мұндай қадам заңдардың сапасын арттыруға ықпал ететіні анық. Бұл жөнінде Мемлекет басшысы Қ.Тоқаев бірнеше рет атап өткен болатын.

СУ МӘСЕЛЕСІНДЕ ЕШҚАНДАЙ ПРОБЛЕМА ЖОҚ



Қырғыз Республикасының Суресурстары қызметінің басшысы Алмазбек Сокеев Қазақстанға суармалы су беруді тоқтатуға қатысты сұрақтарға жауап берді.

Ол 17-19 шілдеде Қазақстанда Шу және Талас өзендері бассейндерінде су бөлу туралы хаттамаға қол қойылғанын атап өтті. Оның айтуынша, су беру секундына 45 текше метрге дейін ұлғайтылған.

«Қырғыз тарапы мұндай суды беру кезінде лимит тамыз айының басында таусылатынын хабарлады. Қазақстан тарапы шарттарды қабылдады. 5 тамыздан бастап осы хаттамалық шешімге сәйкес Қазақстанға су берілмейді. Бұл – екі тараптың да шешімі.

Кеше қазақстандық әріптестерімен телефон арқылы сөйлестім. Ешқандай проблема жоқ екенін

олар тағы да растады. Бұл олардың өтініші еді. Олардың біздің елге ешқандай талабы жоқ. Қырғыз елі суды кесіп тастады деп тараған ақпарат шындыққа сәйкес келмейді. Су болмаса, тосқауыл қоятын ештеңе жоқ», – деп жазды ол.

Айта кетейік, Жамбыл облысына Қырғыз Республикасынан жеткізілім тамыз айының басында тоқтатылды. Жергілікті тұрғындардың айтуынша, халық түгелдей егістік алқаптарда тұрады, сондықтан оларды апат күтін тұр.

Өткен аптада Қазақстанның Экология министрі Зүлфия Сүлейменова Киров және Орта-Токой су қоймаларындағы судың іс жүзінде таусылғанын мәлімдеді. Сүлейменова атап өткендей, «мәселе судың біз үшін тоқтатылғанында емес, мәселе судың оларда да (Қырғызстанда) жоқтығында» болып отыр.

ЖОЛАҚЫ ТӨЛЕУ ЖҮЙЕСІ ӨЗГЕРЕДІ

Елордада жолаушылардың 40 пайызы автобуста жолақы төлемейді. Бұл жайында Астана қаласы мәслихаты тұрақты комиссиясының отырысында айтылды.

Мәслихат депутаты Владислав Сергеев қоғамдық көлікпен жиі жүретінін және жолаушылардың біразы жол ақысын төлемейтінін байқағанын айтты.

Өз кезегінде Астана қаласы Көлік және жол-көлік инфрақұрылымын дамыту басқармасы басшысы орынбасарының міндетін атқарушы Бауыржан Тайбергенов бұл мәселе автобустарда ақы төлеу

жүйесін ауыстыру кезінде шешімін табатынын жеткізді.

«Жол ақысын төлемейтіндер мәселесіне тоқталсақ, бұған QR-код арқылы есептесу жүйесі әсер етіп отыр. Жолаушылардың кейбірі контролер жақындаған кезде ғана жол ақысын төлеуге кіріседі. Жаңа жүйе банк картасы сияқты болады, яғни QR-код жүйесінен бас тартамыз. Азаматтар тек банк картасын пайдаланып, ақыны тек автобустың кіреберісінде төлейді. Егер QR-төлемінен бас тартсақ, банктік жүйе іске қосылса, онда жол ақысын төлемейтіндер шамамен екі есе немесе үш есеге дейін азаюы мүмкін», – деді Б. Тайбергенов.



ПАРТИЯ ТӨРАҒАСЫ АЗАМАТТАРДЫ ҚАБЫЛДАДЫ



Парламент Мәжілісінің Спикері, «АМАНАТ» партиясының Төрағасы Ерлан Қошанов өткен сейсенбі күні партияның Республикалық қоғамдық қабылдау бөлмесінде азаматтарды жеке қабылдады.

Еліміздің әр өңірінің тұрғындары инфрақұрылымды дамытуға, таза ауызсумен қамтамасыз етуге, ерекше қажеттіліктері бар адамдарды қолдауға қатысты және басқа да мәселелермен «АМАНАТ» партиясына жүгінді.

Мәселен, Шығыс Қазақстан облысындағы Алтай қаласының 40 мың тұрғыны атынан хабарласқан бір топ азамат Осинов асуын айналып өтетін жаңа жол салу мәселесін көтерді. Онда жыл сайын мыңдаған турист келеді.

«Алтай және шекара маңындағы Катонқарағай аудандарының тұрғындары үшін бұл жолдың маңызы зор. Мұндағы құрылыс 2018 жылы басталған еді, бірақ кейін толығымен тоқтап қалды. Мемлекеттік орман қорынан жер телімдерін беру жұмыстары кешіктірілуіне байланысты жолды жөндеуге қажет материалдар қымбаттап кетті. Сізден жолды жөндеу жұмыстарын тездетуге көмек көрсетуіңізді сұраймыз», – делінген азаматтардың ұжымдық үндеуінде.

Ерлан Қошанов партия филиалына Индустрия және инфрақұрылымдық даму министрлігімен және Шығыс Қазақстан облысының әкімдігімен бірлесіп отырып, жол құрылысына қажетті барлық жер телімін беру мәселесін тез арада шешуді тапсырды. Сондай-ақ қажетті қаражатты бөледі желделету керек екенін айтты.

«Мемлекет басшысы Қасым-Жомарт Тоқаев шекара маңындағы өңірлерді дамытуға ерекше назар аударып, ішкі туризмді дамытуға барлық жағдай жасауды тапсырды. Бұл орайда аталған мәселелер осы жолды жөндеуге тікелей қатысты болып отыр. Мұндағы жұмыс басталып та кеткен. Сондықтан бұл мәселені қысқа мерзімде шешу керек», – деді партия Төрағасы.

Ал Ақтау қаласының тұрғыны Айсулу Құрманғазиева мен күйеуі Жалғас Қуатов кәсіпкерлікпен

айналысып, сауда павильонын ашуды жоспарлап отыр. Екеуі де екінші топтағы мүгедек.

«Бізге жұмысымызды бастау үшін рұқсат алуға жәрдемдесуіңізді және материалдық тұрғыда көмек көрсетуіңізді сұраймыз», – деді Айсулу Құрманғазиева.

Ерлан Қошанов партияның өңірлік филиалына өтініш берушілерге барынша көмек көрсетуді тапсырды. Ол ерекше қажеттіліктері бар адамдарды жан-жақты қолдау «АМАНАТ» партиясының басымдықтарының бірі екенін атап өтті.

Ақмола облысы Шортанды кентінің 8 мыңнан астам тұрғыны ауызсу тапшылығын сезініп отыр. Мәселенің шешімін іздеген Серікбол Мерей партия Төрағасымен кездесуге келді. «Қолданыстағы жеті ұңғыманың тек төртеуі ғана жұмыс істеп тұр, қалғандарында су қоры таусылған. Әсіресе, жаз мезгілінде егістіктерді суаруға және техникалық қажеттіліктерге көп мөлшерде пайдаланылғандықтан, су тапшылығы айтарлықтай сезіледі», – деді ол.

Ерлан Қошанов бұл мәселені шешу үшін қазір топтық су құбырын тарту жобасы әзірленгенін айтты. Жұмыс көлемі мен оны орындаушылар белгілі болды. «АМАНАТ» партиясының Мәжілістеги фракциясы су құбыры желілерін қайта жөндеуге республикалық бюджеттен жақын арада тиісті қаражат бөледі өз бақылауына алады.

Ал елорда тұрғыны, 11 баланың анасы Нүргүл Қадырбаева екі ұлы Арман мен Анас футболдан Қазақстан мен ТМД елдерінде өткен чемпионаттарда жоғары шеберлік көрсеткенін атап өтті. Сөйтіп, олар Португалиядағы Vsports жастар клубына өнер көрсетуге шақырту алған. Бірақ қаржылық жағдайдың қиындығына байланысты бара ала алмай отыр.

«АМАНАТ» партиясының Төрағасы Батыр анаға жас футболшылар үшін қажетті көмек көрсетілетінін айтты. Бұл мәселеге елорда әкімдігі мен Мәдениет және спорт министрлігі де атсалысатын болады.

Ерлан Қошанов барлық қаралған өтініш бойынша партия филиалдарына нақты тапсырмалар беріп, олардың шешілуін жеке бақылауына алды.

ҚАЛА СЫРТЫНДАҒЫ ЖЫЛДАМДЫҚТЫ ҚАДАҒАЛАЙДЫ



Елімізде қала сыртындағы жолдарда жылдамдықты асырған автокөліктерді тіркейтін аппараттық жүйе жұмыс істейтін болады.

Polisia.kz ақпараттық медиа-порталының мәліметінше, ІІМ қала сыртындағы жолдарда белгіленген жылдамдық режимін асырған автокөліктерді тіркейтін аппараттық жүйені Автомобиль жолдары комитетімен және «ҚазАвтоЖол» компаниясымен бірлесіп іске қосып отыр. Бұл жүйені іске қосудағы мақсат – жол жүру қауіпсіздігін қамтамасыз ету және жол-көлік оқиғаларының алдын алу бойынша бақылауды күшейту.

«33 ZERЕК-2 бағдарламалық-аппараттық кешені әкімшілік өндірістердің бірінғай тізілімі жүйесімен интеграцияланған, яғни нұсқамаларды құқық бұзушыларға жіберу автоматты режимде жүзеге асырылатын болады», – дейді ІІМ Әкімшілік полиция комитетінің ерекше тапсырмалар жөніндегі аға инспекторы Ақтоты Боранова.

Оның сөзінше, бүгінде ZERЕК-2 мынадай автожолдарда жұмыс істеуге дайын: Шымкент

– Қызылорда; Шымкент – Өзбекстан шекарасы; Шымкент – Тараз; Тараз – Қайнар; Қонаев – Талдықорған; Астана – Павлодар.

«Осындай бағдарламалық кешен Көкшетау – Астана тасжолында бұрын іске қосылған болатын және жолдағы құқықбұзушылықтарды тіркеуде жақсы нәтижелер көрсетіп жатыр. Жоғарыда аталған жолдарда 25 тамыз сағат 00:00-ден бастап ZERЕК-2 кешені штаттық режимде жұмыс істейтін болады. Осы мүмкіндікті пайдалана отырып, барлық жүргізушіден жылдамдық режимін және автокөліктер арасындағы қашықтықты сақтауды сұраймыз», – дейді Ақтоты Боранова.

ІІМ дерегінше, жеті айда еліміздің жолдарында 7 мыңға жуық жол-көлік оқиғасы тіркелген, салдарынан 1 200-ден астам адам қаза тауып, 8 500-ге жуық адам түрлі дәрежеде жарақат алған. Жол-көлік оқиғасының ішінде 730 жол-көлік оқиғасы қала сыртындағы трассаларда жылдамдық режимін сақтамаудан болған. Салдарынан 300-ден астам адам қаза тауып, 1 200-ден астам адам зардап шеккен.

